

VIJESTI



Neusaglašeni zakoni o RTV sistemu

Predsjednik Upravnog odbora BHRT-a Nikola Deretić izjavio je da je najveći problem u ovom trenutku za uspostavljanje korporacije javnih emitera to što zakoni o javnim servisima nisu usaglašeni sa Zakonom o javnom RTV sistemu, posebno Zakon o Federalnoj televiziji.

Deretić, koji je predsjednik Nadzornog odbora buduće korporacije javnih emitera, rekao je da je Zakon o FTV-u direktno suprotstavljen Zakonu o javnom RTV sistemu, jer FTV vidi svoje najsnažnije finansijsko uporište u marketingu i nije voljna da postupa u skladu sa Zakonom o javnom RTV sistemu.

Ostaju nadležnosti MUP-a RS-a

Ministar unutrašnjih poslova RS-a Stanislav Čado izjavio je za Srnu da prilikom formiranja antikorupcionog tijela u BiH neće biti preuzimanja nadležnosti od MUP-a RS-a.

"Krajnje odlučno tvrdim da neće biti preuzimanja nadležnosti. U Mapi puta i ostalim dokumentima u vezi sa liberalizacijom viznog režima precizno se govori o antikorupcijskom tijelu, a ne o nekakvom timu, agenciji ili bilo čemu sličnom", kazao je Čado.

On je napomenuo da je MUPRS-a još prije dvije godine usvojio plan borbe protiv korupcije, a da od maja ove godine provodi i akcioni plan koji daje dobre rezultate.



Konferencija studenata jugoistočne Evrope

Unija studenata RS-a organizuje od 19. do 23. augusta u Banjoj Luci Konferenciju studentskih lidera jugoistočne Evrope - SEI miting 09., u okviru koje će biti održana i godišnja skupština Asocijacije krovnih studentskih organizacija jugoistočne Evrope (SEI grupa).

Na ovoj konferenciji učestvuje su najavili studentski lideri iz Slovenije, Hrvatske, Srbije, Crne Gore, Makedonije, Bugarske i Rumunije, a gosti su predstavnici Slovačke i Univerziteta u Mitrovici, saopšteno je iz Unije studenata RS-a.

Nakon dužeg vremena, a na prijedlog Unije studenata RS-a, okupiće se i najviši studentski predstavnici javnih univerziteta iz Sarajeva, Zenice i Mostara.

Otkazana promocija knjige "Dezserter", autora Seada Seferagića

Knjiga je antiratna, ne antijevrejska

Objašnjavao sam im da je gazija borac za vjeru. A u Bihaću i Bosni je najveći gazija Sulejman Veličanstveni. Malo ko zna da je radi vlasti i prijestolja ubio dva svoja sina, sve svoje unuke. A bar 50 ulica u Bosni nosi njegovo ime, kaže autor kontroverzne knjige

Promocija knjige "Dezserter", autora Seada Seferagića, zakazana za 17. august (20 sati, Ljetni festival knjige u Sarajevu), naprasno je otkazana. Padila Nura Haver, koja je trebalo da bude medijator, objašnjava Seferagić, odbila je obaviti taj posao jer je smatrala da je "Dezserter" profašistička knjiga.

Ništa ružno

"U zadnji čas je rekla da odustaje. Opet, književnik Almir Zalihić je bio spreman na promociji reći šta mu se dopada, šta ne. Nura Haver kaže da jeste pročitala cijelu knjigu, ali ja mislim da je pročitala uvod, par stranica i ništa više. Knjiga koju sam napisao duboko je antiratna", kaže Seferagić.

"Dezserter" je njegov prvi roman. Seferagić je elektro-

inženjer po zanimanju. Za mir se bavio proizvodnjom i prodajom medicinskih aparata u Bihaću, a kada je zapucalo, otišao je u Austriju, gdje radi isti posao. I ima državljanstvo te zemlje. O tome kako je napisao "Dezserter" a da nije omirisao baruta, kasnije.

"Nisam o Židovima ništa ružno rekao! Napisao sam da zbog onog što oni sada rade na Bliskom istoku, nije nemoguće da se arapski svijet ujedinio oko nekog svog Ajnštajna koji će izmisliti novo razorno oružje. I šta će onda biti s Izraelom, državom kojoj su Ujedinjene nacije i otac i majka", pita Seferagić, čovjek kojemu su čitanje dokumentarnih i historijskih knjiga opsesija.

Zamjerali su mu i da u svojoj knjizi opravdava Hitlera. Pitate

li ga, reći će kako je u nekoliko rečenica samo rekao stvari koje mnogi ne znaju, a može ih se pročitati.

"Recimo, u trenutku kada je počeo Drugi svjetski rat, Hitler i njegova vojska nisu izašli iz njemačkog govornog područja. Jesu okupirali Austriju, Sudete i Prusku što im je oduzeto Versajskim mirovnim sporazumom. A kada su Britanci i Francuzi objavili rat Hitleru, pod svojom su čizmom imali sav arapski svijet. I to je kao normalno!", pita Seferagić.

Linč u Bihaću

Reklamirajući samizdat svoje knjige, i u Bihaću je Seferagić imao problema. Plakati su pocijepani, a Općinsko vijeće je donijelo zaključak

kako knjiga vrijeđa islam i porodice šehida.

"Zamalo me nisu linčovali u Bihaću. Objasnjavao sam im da je gazija borac za vjeru. A u Bihaću i Bosni je najveći gazija Sulejman Veličanstveni. Malo ko zna da je radi vlasti i prijestolja ubio dva svoja sina, sve svoje unuke. A bar 50 ulica u Bosni nosi njegovo ime", ljuti se autor "Dezserter".

On sam je, veli, duboko protiv rata. I spreman je za mir prodati obraz, ponos, biti rob, "jer ništa nije vrijedno dječije suze". Ako je to čitaocima bitno, autor "Dezserter" ne vjeruje u Boga. Misli da na BiH nije izvršena agresija, no je u nas bio "vjerski rat s elementima građanskog". Njegov je roman, misli on, otvorio tabu teme.

A. BEČIROVIĆ



Seferagić: Roman dira u tabu teme

Borci protiv umanjavanja naknada

Šta će ministru pet savjetnika?

Ukoliko i sastanak sa čelnikom SDA rezultira nepovoljno za bivše ratnike, najavljene su nove demonstracije i protesti već početkom naredne sedmice

Predstavnici četiri boračka udruženja Tuzlanskog kantona jučer su osudili odluku Vlade Federacije BiH da julske naknade za boračku populaciju umanju za deset posto. Ratni vojni invalidi (RViBiH), Udruženje porodica šehida i poginulih boraca, HVIDRA i Druga obitelji palih i nestalih branitelja HVO-a Soli zatražili su da se već prilikom isplate augustovskih naknada uplati i "nelegalno oduzetih deset posto", te da se isplata nastavi po ranije utvrđenom kriteriju.

"Premijeru smo prije deset dana poslali pisani zahtjev za sastanak. Iako je on rekao da nema potrebe da šaljemo zahtjeve, da će nas uvijek primiti, do danas iz njegovog kabineta nema odgovora. Stoga smo zatražili sastanak sa Sulejmanom Tihićem, koji je njegov šef, kako bismo poku-



Traže prijem kod Tihića

šali riješiti ovu situaciju. Ukoliko i to ne bude dalo rezultata, bićemo primorani da se borimo za naša prava koristeći pri tome i sredstva koja zakonom nisu dozvoljena", poručio je predsjednik Saveza RViBiH Safet Redžić.

Ukoliko i sastanak sa čelnikom SDA rezultira nepovoljno za bivše ratnike, najavljene su

nove demonstracije i protesti. To bi se, prema jučerašnjim najavama, moglo desiti već početkom naredne sedmice.

"Znamo da je u Vladi FBiH najmanje 20 posto više zaposlenika nego što treba. Što će jednom ministru pet savjetnika? Kada im ni to nije dovoljno, onda ih angažiraju u raznorazne komisije kako bi se-

bi namaknuli što više novca, a jednoj obitelji poginulog branitelja ili ratnom vojnom invalidu odbija 10 posto", primijetio je Zvonimir Kubinec, predsjednik Udruge obitelji poginulih i nestalih branitelja HVO-a Soli, nazivajući odluku o umanjavanju naknada sramotom federalnih vlasti.

A. Še.